

هتساعدني بلدك بدور ايجابي و لا هتقرفني من بلدك عشان هي عالم  
تالت! و تاني هالخص و اقول  
باختصار : الحرية معلومة , الحرية أفكار , الحرية قرار ) .  
اعرفني و فكري و قرري

أنا زي ستات كتير اتعودت علي متابعة النظر في موبايلي و ما باحبش  
ابعد عنه كتير . لو سألتني ليه بتحبي الموبايل و علي  
طول بتبصي فيه ، هاقولك الحقيقة إن موبايلي بكل الابليكشنز اللي  
عليه ، زي الفيسبوك و الواتس اب و المكالمات المجانية  
عبر القارات و الانستجرام و كل الجرايد و المجلات و جوجل العزيزة  
جدا بيخلوا موبايلي عزيز علي جدا و كأنه فرد من  
أفراد أسرتي بالعكس أفراد أسرتي ممكن ما يكونوش بيقدموا لي كل  
اللي موبايلي بيقدمه لي و عشان كدة بيبقي عندي دوافع  
كتيرة إنه ما يفارقتيش أبدا

١ - هو الحاجة الوحيدة اللي لما باسأله أي سؤال ، بيجاوبني بسرعة  
و ما بيقولشي لما افضي هارد عليكي

٢ - عنده دايما إجابات لكل أسئلتي

٣ - بيجاوب علي بطريقة لذيذة و بالصوت بالصورة و الفيديو:

٤ - مش بيزهق من كتر أسئلتي

٥ - بيفهمني ؛ لما باحب أعرف موضوع، علي طول يفهم إنني باحب

النوعية دي من المواضيع و يجيب لي ما يشابهها

٦ - باعمل به زيارات لكل اللي أنا عايزاهم من غير ما أقوم ألبس و لا

أخذ هدية وأنا رايحة

٧ - بيسليني و بيضحكني جدا من خلال النكت و القفشات اللي بتتبع

عليه

٨ - بيفكرني بكل المناسبات الدينية و الأعياد

٩ - أقدر أعرف آراء كل اللي حوالي في كل المواضيع اللي بتحصل من

غير ما أضطر أدخل معاهم في نقاشات جدلية

١٠ - باقدر أعمل بلوك للي مش عايزاهم أو اللي بيضايقوني و أنا

ضميري مرتاح

١١ - بيحسني بالأمان إن عمره ما هيزهق مني، بالعكس أنا اللي

ممكن أزهق منه و أرميه و لما أرجع له، عادي بيكون قلبه

أبيض و مش شايل مني

١٢ - عمره ما بيبص لي علي إنني أقل منه علما

- ١٣ - باقدر أقول رأيي بصراحة فيه
- ١٤ - باعرف الاخبار و الرأي العام أسرع من خلاله
- ١٥ - باظمن منه علي عيلتي و أخبارهم
- ١٦ - بيساعدني إنني أقدر في لحظة واحدة أجيب وصفة أكل و بالتالي بيساعدني في إجابة السؤال اللي كل عيلتي بترفض الرد عليه :هناكل ايه بكرة
- ١٧ - بيساعدني أختار لبسي، لأن برضه ماחדش فاضي يساعدني أو يقول لي ألبس إيه في المناسبات الجايه
- ١٨ - باعرف عروض الخصومات و التوفير اللي في المحلات منه
- ١٩ - يقدر يترجم لي أي حاجة مش فاهماها من لغة للغة ، و يقول لي انطقها كمان ازاي
- ٢٠ - وزنه خفيف في شنطتي
- ٢١ - باخذ بيه صور سيلفي و لعيلتي : يعني بيوفر علي إنني أشيل كاميرا و بيوفر حق طباعة الصور كمان
- كل دة و عايزني ما أبصش عليه كل شويه ، دة أنا حتي يبقي ما عنديش اصل????????